



## საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

---

### თულაშვილი ივანე ნიკოლოზის ძე

თულაშვილი ივანე ნიკოლოზის ძე (21. VIII. 1863, თბილისი, - 20. II. 1930, იქვე), სამხედრო ინჟინერ-მშენებელი და პედაგოგი. საშუალო განათლება მიიღო თბილ. სამხ. გიმნაზიაში (1882 შემდეგ კადეტთა კორპუსი), სპეციალური - პეტერბურგის სამხ.საინჟ. სასწავლებელსა და ნიკოლოზის სამხ.-საინჟ. აკადემიაში (დაამთავრა 1890, სხვა ცნობით 1892). 1892-95 მსახურობდა მოსკ. სამხ. ოლქში, 1896-1903 - მოსკ. ქალაქის მმართველობის ინჟინრად, 1904-08 - მოსკ. უნ-ტის კლინიკების არქიტექტორად. კერძო დაკვეთით აშენებდა საცხოვრებელ სახლებს (1895-1918). ასწავლიდა ფორტიფიკაციასა და სამშ. საქმეს მოსკ. ალექსანდრეს სამხ. სასწავლებელში (1895-1918), ინჟ. პრიოროვის სამშ. კურსებზე (1904-14), ქალაქის სამშ. კურსებზე (1905-09). 1921 მიიწვიეს თბილ. უნ-ტში პოლიტექნიკური ფაკ-ტის დაარსებასთან დაკავშირებით (გაიხსნა 1922 წ. 16 იანვარს). 1922 არჩეულ იქნა დოცენტად და ფაკ-ტის მდივნად. კითხულობდა სამშ. სამუშაოთა, სამოქალაქო ხუროთმოძღვრების, ფუძე-საძირკვლების, სახუროთმოძღვრო გეგმარების თეორ. საფუძვლებისა და გათბობა-ვენტილაციის კურსებს. გარდაცვალებამდე მუშაობდა სპი-ში. თვალსაჩინო წვლილი მიუძღვის საქართველოში ხუროთმოძღვრული დარგის ორგანიზაციასა და პირველ ინჟინერ-მშენებელთა აღზრდაში.

ლიტ.: მ ე ტ რ ე ვ ე ლ ი რ., კვალი განათლებული, თბ., 1975; ტფილისის სახელმწიფო უნივერსიტეტი. 1918-1928, [ტ.] 1, ტფ., 1928.

**ვ. ბერიძე**

---